

Osakidetzak erabiltzaile berrien hizkuntz erregistroa egingo du

Osasun Sailak Osakidetza II. Euskara Planaren ildo nagusiak azaldu berri ditu. Erabiltzaileen eta langileen hizkuntz lehenetasunez eman dituzte azalpenak. Hasierako asmoa Osakidetza erabiltzaile guztiei zein hizkuntza lehenetsiko zuketean galde-tzea bazen, jasotako kritiken ondorioz erabiltzaile berrietara mugatuko dira. Hau da, ekainera bitartean erabiltzaile berrien erregistroa egingo dute eta haiei galde-tuko diete zein hizkuntza lehenetsen duten Osakidetza erabiltzaileekin harremanetan. Ohiko erabiltzaileak ez dira plan horretatik zeharo kanpo geratuko. Haiei lehen arretako zerbitzuetan galdetuko diete eta norberaren datuen artean gordeta geratuko da.

Galdetzeak ordea, ez du derrigorez esan nahi eskatutako hizkuntzan aritzeko aukera emango dutenik. Hori da planari egin zaion kritiketako bat, eskatzeko aukera izango da, baina herritarrei ez zaie



bermatuko euskarazko arreta. ELA eta LAB sindikatuek adierazi dutenez, hortaz gain, lehen mailako zerbitzuetan herritarren eskubideak bermatzen saiatuko dira, esate baterako, harrerako eta administrazioko jendaurreko arreta. Medikuek ordea, zuzeneko harremana dute herritarrekin, eta talde hori euskalduntzeko neurriak apaltzat jo dituzte bi sindikatuek.

Arreta guneetan euskaraz artatuko gaituzte, ia seguru; euskaraz aritzeko gai den mediku espezialista egokitzea aldiz, mirakulua izan ohi da. *Euskaraz bai sano!* kanpainako afixak eragindako irribarre konplizea laster itzali zaigu.

Bahea

Joxan Garaialdek sustatu.com-en esanak:

“Egungo euskaltzainek ba al dute eskubiderik kolokan jartzeko ia ehun urte duen instituzioa, zazpi lurraldeetan eragina duena eta lautan ofiziala dena, eta, batez ere, orain arte eta baita etorkizunean ere euskararen jardunean garrantzi handia duena? Ez, instituzio hori ez da euskaltzainena, herriarena baizik. Badakigu ez dela instituzio demokratikoa; euskaltzain berriak izendatzeko irizpide politikoak erabili izan direla, askotan, akademikoak baino gehiago (gogoan dugu Txillardegirekin egindakoa); euskaltzainek berak erabakitzen dutela hutsuneak norekin bete; euskalgintzan diharduten beste instituzioak ez dutela parte hartzerik, eta abar. Baina, hori alde batera utzita, esan beharra dago Euskaltzaindia guztiona dela, ezin dela instituzio horrekin jolasean ibili, eta nahitaezkoa dela krisi horrekin bukatzea, pertsonalismoak alde batera utzita. Azkenik, herri honi gertatutakoaren berri osoa eta soluzioaren nondik norakoak eman beharrean zaudetela, geure instituzio batekin ari baitzarete”.

EKONOMIAREN TALAIAN • TERMOMETROA

Gasteiz-1976tik Bilbo-2014ra

MARTXOAREN 3AN 38 urte beteko dira poliziak Gasteizko bost langile hil zituenetik, euren eskubide sozial eta laboralen defentsan greban ari zirela. Sarraskia poliziak egin zuen, baina Fragak eta Martin Villak gidaturik. Kapitalaren kudeatzaile politikook, zurruntasunez, grebalariek aldarrikatzen zutena negoziatzeari uko egin zioten. 38 urte geroago, martxoaren 3an, Bilbo kapitalismoaren nazioarteko egoitza izango da, *Foro Global España 2014: de la estabilidad al crecimiento* (Espainia 2014 Foro Globala: egonkortasunetik hazkundera) bilkura egingo baitute. NMF, ELGA, EBZ, Europako Batzordea eta beste hainbat erakunderen ordezkariak izango dira bertan. Kudeatzaile politikoez eta ohiko gobernuek –Madrilgoa zein Gasteizkoa–, ez dute dudarik izan harrera egiteko. Urkullu lehendakariak hasiera emango dio foroari eta Espainiako presidente Rajoyk itxiko du.

Euskal Herriko gehiengo sindikal eta sozialak eskatu du mobilizatzeko, jendarteari inposaturiko murrizketen arduradunak salatzen. Buruzagi horiek soldata milioi-

dunak dituzte eta eurek inposatu dituzte langabezia, bazterketa soziala, pobrezia, eta prekarietatea ekarri dizkiguten politika kapitalistak. Euren erruz izoztu dituzte soldatak eta pentsioak, eta laguntzak murriztu. Eurek erreskatatu dituzte bankuak diru publikoz. Eurek mantentzen eta babesten dituzte paradisu fiskalak. Euren politiken ondorioz sortu da immigrazio politiko eta ekonomikoa, eta bidean hil dira ogi eta askatasun bila joandako asko eta asko, Ceutan, Melillan eta Lampedusan gertatu bezala. Eurak berak dira, behar izanez gero, Gasteizko 1976ko sarraskia errepi-katuko luketenak. Lehendakariak, EAeko ordezkari politiko gisa, egun horretan sindikatuen eta eragile sozialen alboan egon behar luke, kalean, politika horiek arbuizatzen. Ez da egongo ordea, bera ere kapitalismo basatiaren kudeatzaile politiko bihurtu delako.

Juan Mari Arregi

